



Comme Iesus-Christ mourut en la Croix, & de ce qui aduint apres son trespas.

DEPVIS l'heure de six heures iusques à neuf, qui est depuis midy iusques à trois heures à nostre façon de compter, il y eut des tenebres sur toute la terre ; & enuiron neuf heures Iesus s'écria à haute voix, disant ; *Eli, Eli Lamasabathani* ? c'est à dire, Mon Dieu, mon Dieu, pourquoy m'as-tu delaiissé ? Et incontinent quelqu'un des assistans courut, & prit vne éponge, & l'ayant emplie de vinaigre, la mit au bout d'un roseau, & luy en bailla à boire, & lors Iesus criant derechef à haute voix, rendit son esprit ; lors le voile du Temple se fendit en deux, la terre trembla, & les pierres se fendirent. Les monumens s'ouurent, & plusieurs corps des Saints qui estoient decedez, se leuerent, lesquels estans sortis de leurs monumens entrèrent en la sainte Cité, & s'apparurent à plusieurs. Ce que voyant le Centenier, dit, Vrayement cettuy estoit le fils de Dieu. Et les soldats vindrent par la permission de Pilate, pour oster les corps des crucifiez, & rompirent les iambes des deux larrons ; ce qu'ils ne firent à Iesus qu'ils trouuerent mort. Ains vn des gens-d'armes luy perça le costé avec vne lance, & incontinent il en sortit sang & eau.

S. Matthieu Chap. 27. S. Marc Chap. 15. S. Luc Chap. 23. S. Iean Chap. 19.